

Rhyserva 2024

Mir flaniere und blockiere!

Wottsch goo flaniere in unsere Stadt,  
Oder blockiere fändsch au no glatt,  
Doch bevor des kasch wooge,  
Muesch dy zerscht no frooge,  
Jä nundefahne,  
Wo kasch no aane.  
Es goot jo scho loos,  
In dr Freyestrooss,  
Deert blockiert ai Baustell die Näggscht,  
Und s goot grad wyter im Täggscht,  
Nämmli am Märtplatz unde,  
Hänn mir no e wyteri Blockade gfunde,  
Im Rohthuus hinder dr Fassade,  
Het jede wie dr Näggscht die greesser Blockade.  
Flaniersch wyter richtig Rhy,  
Dänggsch das kaa jo nit sy,  
Demonstrante glääbe uff dr Mittlerebrugg,  
Und kai Drämmli faart me hie und zrug.  
Dr Grund fir was die demonstriere,  
Ass me kaini Demos me darf durefiehre.  
Also guet dä Grund isch zwoor nit dumm,  
Mir draihe aber trotzdem um.  
Via Fischmärt flaniere mir am Gifhüttli vorby,  
Und dängge das darfs nit sy,  
Jetzt ischs Hotel Basel zue,  
Wo schlooft denn an dr Fasnacht dr Heiri mit syner Kueh?

D Köch dien jetzt wo andersch ihr Schnitzel paniere,  
Und mir mien e Huus wyter flaniere.  
Via Rümmelin und Gläbbergässli,  
Sin mir am Barfi und sehn scho s näggsti Gspässli,  
Au s Kohlmanns macht noch dr Fasnacht dicht,  
So heere mirs ämmel im TeleBasel Bricht,  
Guet wenn mir scho bym Thema sin,  
Blyybe mir doch au grad drinn.  
Mir finde s TeleBasel isch au bitz blockiert,  
Ab däm Sänder sin mir fang schoggiert,  
Kuum gweensch dy ans neie Format,  
Hänn sy scho e neis barad,  
Nur ebbis erinneret uns no an e Sänder mit Styyl,  
D Plauderdäsche vo Wattewyl.  
S Programm vo däm Sänder duet aim weh,  
Allewyyl nur d Blockade vom FCB,  
Vom Morge bis Zoobe zaige sy ungeniert,  
Wie dr FCB gmiedligg iber s Fäld flaniert.  
Bym lääse vo dem Zeedel fällt dir uff,  
Unsri Stadt isch s rainschti Blockadebuff.  
Drumm liebe mir d Fasnacht mit unsere Frinde,  
Will vyyli Blockade denn verschwinde,  
Wenn alli Fasnächtler drey Dääg dur d Stroosse schlyyche,  
Wänn doch eigendligg alli s glyyche,  
Drey Dääg alles vergässe und frey könne sy,  
Ob uffem Seibi, Minschter oder am Rhy,  
Ob by dr Kasärne, by dr Mäss oder uff dr Wettstaibrugg,  
S wänn alli d Zytte ohni Blockade zrugg!